

***NAHUMA******Ududu wa Somboya ka Latuyalaka***

**1** Enelo lu dikambu dia Niniva. Buku di'enele ka Nahuma, usi Elekoshe. 2 Latuyalaka eli Unyashungu a kandjema, ndu latosomboyaka. Latuyalaka atosomboyaka ndu eli too la ududu. Latuyalaka atosomboyaka wane watfuhetshaka, Atulalelaka atunyi andi ududu. 3 Latuyalaka huki kele esadi, Ndi eli wuki lu wulu andi, Ndi huyindja kanga unungu.

Mbuka ka Latuyalaka keko lu punganendji ndu luhunga; Wangi weko ditshu di'ekulu andi. 4 Ndi atuhangwelaka ashia waki, atuwaumiaka. Ndi atumiaka ndjali tshe. Bashana la Karamele wambolengela, Ndu alemba wa Lebanonwa wambolengela. 5 Ekungu wambudidima la ntundu kandi, Akuna wambolelo. Kete yambunyiamma la ntundu kandi, Ee, andja la wane tshe wudjashi loko.

6 Akona eya memala la ntundu ka kele kandi? Akona eya nshikikala lu luhaladi la kele kandi? Ududu andi wambutshulo uku dja. Ave watatateka betshi betshi la ntundu kandi. 7 Latuyalaka eli ololo. Ndi eli eshamelu lu lushi la pa. Ndi mbeyaka wane watuyangaka eshamelu le ndi. 8 Keli la elula ka shashimuya, Mbayundulanya usumba wa Niniva, Mbayunduelana l'atunyi andi pulu lu udjima.

9 Kakona kasanguyanyu ntshela Latuyalaka? Ndi ayulanya tshe. Sui hadienama etena ka hendi. 10 Vo wambutshumbawa Uku atende wudingitanyi, Uku adiyu wambumba. 11 Untu omotshi akatumbi uma l'atei aye, Lakasanguya dia ntshela Latuyalaka kolo, Ndi aki la kanyi ya kolo.

12 Latuyalaka kata ati: Kuyanga mbewo la wulu, ndu mbewo efula, Vo wayulanyema, wayushisho. Kuyanga mbakamakusuya, dimi halukusuya ntu. 13 Kakiane dimi lutsha mbokola lokoho landi leli ladiku diaye, Ndu lutsha mpimbula ekodi aye tenyi tenyi.

14 Latuyalaka ambudja olefbe lu dikambu diaye, Diaha lukumbu laye ndjala

pundju. Dimi layulanya efanelu ka losela La efanelu ka lolelola uma lu luudu la ditemolatemola diaye. Dimi layukutshimela diumbu diaye, Ne dia we ambuyala engo kaha la nemo.

***Lukumu la Ekwelo ka Niniva***

15 Nyendi akaka wa one layela lukumu l'ololo, Lata akambu wa ki ladiku di'ekungu! Uyalila nshi yaye ya waki, we Juda. Ushidiya alokoloko aye, Ne dia untu a kolo heta l'atei aye ntu, Ndi ambulanyema tshe.

**2** One latuhimbula tenyi tenyi ambuya dia ndjolo la ye. Ulami wumbe wa ta, endaki mbuka. Ukikitsha uya lu lukindi laye, Ukikitsha wulu aye tshe.

2 (Ne dia Latuyalaka ambulula lutumbu la Jakoba, Uku lutumbu la Isariyele, Ne dia apotodi wakahotola, wakalanaya tahi yowo.) 3 Dingawu di'apami andi wa wulu diambulyala tilili. Ahuka wa wulu wambolota eloto wa tilili. Pusupusu yambuyala ngaingai Uku lumbi la dja lu lushi l'elongoswelo kandi. Falasa ya ta yambuhasahaha. 4 Pusupusu yambuyala la ududu lu mbuka, Yambukhunguso lene la lene lu esese. Enelo kayo keli uku ewa. Yo yambulawo uku angadimu. 5 Ndi mbuhoka antu andi a waki, Vo watusukosukoka lu lokendo lawo. Vo watusamanya utsha l'eheli kawo: Eshamelu kambolongoswama. 6 Asuku w'okedi wambudiho, Luudu la khum'ekanga lambunyuko. 7 Wadi a khum'ekanga ambukulwama ahondo, ambembama. Ekambi andi w'amantu wambulela, Wambukhuma akhumu uku fudu ya binga, Wayakomola lu tulu. 8 Uma lu nshi ya ntundu, Niniva aki uku eduwa k'ashi, Keli wambulawo. Vo wambuhangohango vati: Nyemali! nyemali! Ku nduku untu lewo l'okongo. 9 Nyumbi dimbu dia fesa, nyumbi dimbu dia paunyi, Ne dia eumbelu kema la ekumelu, Lutumbu la diango di'ololo tshe.

10 Vo wambuyala hwe, wambuyala tongo tu, wambulanyema. Etema wambuyala ashia

atu, adui wambusakana. Sasi diambuwanda vo tshe; Dundji diawo diambukadimo. 11 Lend'eli difuku dia tambwe, Wuku w'esongo wa tambwe, Lene akatolaka tambwe nyama yakatandaka, Lene aki tana tato, Ku nduku untu lawautsha woma? 12 Tambwe atatshatshaka betshi diukuki le ana ato, Atudiakaka ne dia wadieto. To katuludiaka weuku ato la nyama yakatandji, La afuku ato la emuny wakatahimbuli.

### *Elanyelu ka Mamba ka Niniva*

13 Ulungi, dimi layendana la ye, mbata Latuyalaka Kanga lulimbilimbi, layutshumba pusupusu yaye lu dja. Yombo yayudiaka esongo aye wa tambwe. Dimi layunya nyama yatuyundaka uma la kete. Ndu aui w'akendji aye hawukema ntu.

**3** Mananu kayali le usumba wa dikila, Wuludi too la kashi la dihotwanelu, wahakimo diango! 2 Paka ekuma w'ohehela, lundju l'etshimbi, Ekhunguswelu ka falasa ndu elimbulimbwelu ka pusupusu! 3 Ambahemi wa falasa watatshu, Tombo tatangadimo la akonga watalingalinga, Ului w'andjakemi, Tuta dia wuki di'edu, Edu kema l'ekumelu, Vo watutakanaka ladiku di'edu! 4 Akambu tshe ne dia umuntu kanga munanyi, Latuyalongsolaka dia nkutula apami. Umuntu kanga doka dia mamba, Lakasundja wedja uma lu luseka landi, La khumbu uma lu doka diandi. 5 Ulungi, dimi layendana la ye, Layukufula ahondo aye la ntundu kaye. Dimi layenya wedja utakataka aye, La waulelu sonyi kaye, Mbata Latuyalaka Kanga lulimbilimbi. 6 Dimi layukadja diango dia mindu ladiku diaye. Layukete engo kaha la nemo, Ndu layukete engo ka dienyanyu. 7 Ku wane tshe wayukena, wayukulawoka; Wayutaka vati: Niniva ambulanyema. Akona ayukhumu akhumu lu dikambu diandi? Uma lendi ayumûyangela asambi

8 Undi, we kuleki Tebese kaki l'umamu wa Nile ololo, Kakadingami l'ashi, kaki la ashi a waki uku lungeli, Ndu la ashi uku eheli kato? 9 Etiyopiya la Edjibitu waki wulu ato, Wulu ako tawaki la ekumelu. Ndu Puta la asi Libiya waki ekimanyidi ato.

10 Keli vo wakatolama, wakatshu utsha lu fumbi. Ndu an'awo w'ashashi wakatshatshema Betshi betshi l'ete w'esese tshe. Vo wakukela antu awo wa lukumu uwali, La antu awo a waki tshe wakakelekama la molola. 11 Ndu we ayudjo, we ayuyashe. We ayuyanga eshamelu ka mbishama utunyi aye. 12 Wembe aye wa ta tshe wayuyala uku etamba wa fingu, Kame la elua wa fingu wambela ntundu. Naka vo wambusutshasutshama, Ku vo nko l'unyo w'alimbi. 13 Ulungi, alimbi aye weko amantu l'atei aye. Asuku wa kete yaye wambudihwama le atunyi aye. Dja yakatshumbi ekengiti aye.

14 Uduwuli ashi ne dia edjaselu, Ukitisha wembe aye wa ta. Oto lu kete y'omoma, uyisohe potopoto, Ukitisha khukha k'atafadji wulu! 15 Dja yayukutshumba leko; yombo yayukudiaka. Yo yayukudiaka. Yo yayukole uku atolekaka endjo akatshi. Uyafudia efula uku endjo, Ufulaneli uku waomoi a dikata! 16 We akafudia ambetshetshi aye, w'ukanda Uleki toto ta l'ulungu. Endjo watulanyaka, ku watufumboka. 17 Ewandji aye welu uku waomoi a dikata, La afundji aye uku bumbu dia endjo, Watahemaka lu peli lu lushi la tshitshi. Keli lam'atandaka unya, vo watufumboka, Ku dihuli diewo hadieyama. 18 We khum'ekanga k'Asuriya, Alami aye w'ekoko wambotokokala, Antu aye a waki wambumuya; Wudja aye wambuhandjo vwa ladiku di'ekungu, Nduku untu lâsanganya. 19 Nduku lodia ne dia ehumwelu kaye Puta kaye kaya kandji efula. Wane tshe watukaka lukumu laye, Watuhumaka saka dikambu diaye; Ne dia akona aki kolo kaye kunkumaka le ndi tena tshe?